

摘藻堂四庫全書薈要

集部

欽定四庫全書薈要

集部

御選元詩卷三

四

詳校官原任主事臣李斯咏



欽定四庫全書薈要卷一萬八千四百十五

集部

御選元詩卷三

樂府歌行二

趙孟頫

有所思

思與君別來幾見芙蓉花  
盈盈隔秋水若在天一涯  
欲涉不得去茫茫足煙霧  
汀洲多芳草何心采蘅杜  
青鳥翔雲間錦書何時還  
君心雖匪石祇恐彫朱顏  
朱顏不



可仗那能不惆悵何如雙翡翠飛去蘭苔上

烈婦行

并序

至元七年冬濱州軍士劉平之戍棗陽與其妻胡  
俱道宿車下平為虎所得胡起追及之殺虎脫其  
夫吾聞之中原賢士大夫如此乃為感激慷慨作  
烈婦行以歌之

客車何焞焞夫挽婦為推問君將安去言往棗陽戍官  
事有程宿車下夜半可憐逢猛虎夫命懸虎口婦怒髮

指天十步之內血相濺夫難再得虎可前寧與夫死毋  
與虎生呼兒取刃力與爭虎死夫活心始平男兒節義  
有如許萬歲千秋可以事明主馮婦卞莊安足數嗚呼  
猛虎逢尚可甯成甯成奈何汝

秋夜曲

葡萄架空墮殷玉遙夜露寒生體粟暗蛩棲草鳴不平  
無絲絡緯空勞促夢魂苦短道苦長萬山深處非吾鄉  
玉蟲搖釭螢入屋去鴈來魚應可卜醒眼熒熒愁萬斛

燕脂駿圖歌

騏驎騷裏世常有伯樂不生淹棧豆歛見此圖神自王  
權奇磊落龍為友隅目晶熒生紫光錦毛錯落蒙清霜  
霜蹠蹙踏寒玉響霧鬣振動秋風涼朝浴扶桑騰浩蕩  
暮秣崑崙超象罔雄姿似隘六合小盛氣欲籟浮雲上  
嗅塵一飲驚肉飛奮迅不受人間鞿豈惟萬馬羞欲死  
直與八駿爭先馳只今相者多舉肥歎息此圖誰復知  
君不見王處冲半生隱德真成癡

袁掬

安南行

送李景山  
侍郎出使

輶軒使者安南來  
紫泥封詔行風雷  
濕雲翻空海波立  
鐵網山裂狂蛟摧  
神京煌煌鎮無極  
火鼠燭龍窮髮北  
彈丸之地何足論  
蚯蚓為城霧為域  
瘴江如墨黃茅昏  
羣蠻渡江江水渾  
千年白雪不到地  
十月青梅猶滿邨  
赤脚搖脣矜捷鬪  
竹箭藏蛇雜猿狖  
強曾誇井底蛙  
低徊自比泥中獸  
龍飛天子元年春  
萬邦執璧修臣鄰

朱干玉戚廣庭舞笑問銅柱今何人君不聞重譯之人  
越裳氏有道周王輸白雉又不聞防風之骨能專車神  
禹震怒行天誅李侯桓桓水蒼珮舌本懸河四方對後  
車並載朝未央稽顙九拜乞取金印歸炎荒

李宮人琵琶行

先皇金輿時駐蹕李氏琵琶稱第一素指推却春風深  
行雲停空駐晴日居庸舊流水浩浩湯湯亂人耳龍岡  
古松聲寂寂歷歷不足聽天鵝夜度孤鴈響露鶴月唳



哀猿驚鷗絃水晶絲龍柱珊瑚枝願上千萬壽復言長  
相思廣寒殿冷芙蕖秋簇金雕袍香不留望瀛風翻浪  
波急興聖宮前斂容立花枝羞唬蝶旋舞別調分明如  
欲語憶昔從駕三十年宮壺法錦紅茸氍毹駝峰馬漣不  
知數前部聲催檀板傳長樂晝濃雲五色侍宴那嫌頭  
漸白禁柳慈烏飛復翾為言反哺明當還朝進霞觴辭  
輦道母子相對猶朱顏君不聞出塞明妃恨難贖請君  
換譜回鄉曲

三馬歌

東坡三馬贊本

羌水渾蜂解屯瑞至人率獸尊參以陳仰天門龍為鱗  
炳虎文髯悍獍效伏馴鑾鏘鏘馳道遵帝乘虬相攀雲  
逝無留返崑崙

楊花曲

上都楊柳瘦且堅葉葉不展圓如錢年年飛花作端午  
遠客乍見心茫然上都飄雪不知數此花與雪相旋舞  
黃鸝聲絕孤鴈鳴萬騎千車互來去手攀短條心欲絕

宛轉成愁恨初結寒風飛蓬卷車輪點點相亞隨明滅  
南鄰蕩子衣夜單曉望出日如黃綿辛勤掇拾不敢棄  
願刮龜毛同作氈

裘馬曲

綵絲絡頭百寶裝猩血入纓火齊光錫鈴交驅八風轉  
東西夾翼雙龍岡伏日翠裘不知重珠帽齊肩顫金鳳  
絳闕蔥朧旭日初逐電迴飈斗光動寶刀羽箭鳴玲瓏  
鴈翅却立朝重瞳沈沈梭殿雲五色法曲初奏歌薰風

酏官庭前列千斛萬甕蒲萄凝紫玉駝峰熊掌翠釜珍  
碧實冰盤行陸續須臾玉卮黃帕覆寶訓傳宣爭頻首  
黑河夜渡辛苦多畫戟雕闔總勲舊龍媒嘶風日將暮  
宛轉琵琶前起舞鳴鞭靜蹕宮門閉長跪齊聲呼萬歲  
竹枝宛轉詞

聞郎腰瘦寄當歸望盡天邊破鏡飛昨夜燈花圓似粟  
倚門不肯送郎衣

年年河鼓度天津郎在灤陽見得真今夕定知郎到日

桂花浮魄滿香輪

行路難

桑乾嶺上十八盤  
赫日東出紅團團  
回首平田樹如髮  
北去沙石何漫漫  
青帘高低知客倦  
勸汝一杯下前坂  
馬蹏護鐵聲琮琤  
帖石朱闌列危棧  
度嶺林昏泊官驛  
冰湧虛泥踰五尺  
馬行猶知泥淺深  
重車沒踝路莫尋

青閨怨

妾家住在湘江曲  
門枕湘江春水綠  
年年長是暮春時

兩岸人家啼布穀自君話別湘江頭獨上層樓彈箜篌  
蛾眉不埽遠山碧滿隄芳草春正愁舉頭不見君但見  
湘江雲江雲聚復散妾心空如薰舉頭不見君但見湘  
江水江水去不回妾顏為誰美湘江雲湘江水雲水悠  
悠何日已舉頭望君君不回門前楊柳空依依

碩裕實哈雅

采石歌

采石山頭日顏色采石山下江流雪行客不過水無跡

難以斷魂招太白我亦不留白玉堂京華酒淺湘雲長  
新亭風雨夜來夢千載相思各斷腸

張養浩

擬四季歸田樂

春

日月底天廟陽瘴土脉生習習協風來顚顚衆蟄驚農  
人服厥畝薄言事春耕缺堤流瀼瀼灌木鳴嚶嚶白扉  
飀青帘綠野明丹英蠶婦喜形色牧豎歌傳聲天隨野

色遙山與吟懷清向來慳一際今者幸四并徜徉子真  
谷萬事秋毫輕

夏

北陸展修晷薰風薦微涼麥波浩無津細路如橋梁溪  
光林樾潤雨氣桑麻香春聲破幽寂人影來微茫缺垣  
誰所居紅碧相低昂翁媪老瓦盆兒女前捧觴我行適  
見之亦覺心樂康昔聞太古俗今歷華胥鄉向令早知  
此詎使田園荒迷途諒非遠淑景良未央於焉遂平昔



孤陋庸何傷

秋

黃雲亘郊野農力今有功茲乃民之天治理根其中我  
雖未及粒已覺飢腸充田頭父老過擊壤今歲豐自愧  
無寸積坐享雍熙風秋成既如彼況對菊與楓氣澄天  
宇高心寂塵累空木落山獻體波縮沙留蹤遐興何悠  
悠迅景何息息俯仰田舍底或能保初終

冬

歲晏日南至場圃靡所勞告成三務功盈耳康衢謠鴉  
飛嶺外陂虹斷林邊橋將期養疎拙詎厭居寂寥負暄  
坐晴簷煦煦春滿袍對山閱吾書懷古酌彼醪此樂天  
所靳何幸及草茅雖非鹿門龐或庶彭澤陶為詩寫幽  
尚刊落華與豪集以貽知音悵望心搖搖

辛文房

蘇小小歌

東流水底西飛魚銜得錢塘紋錦書幾回錯認青驄馬

著處閒乘油壁車  
鸚鵡杯殘春樹暗  
葡萄衾冷夜窗虛  
蓮子種成南北岸  
苦心相望欲何如

柯謙

范文正公書伯夷頌并札卷歌

企清風兮薇山之陽  
寶芳帖兮薇露之香  
意人世不可  
以久留兮雷霆下而取將  
幸鄴侯之中襲兮儼墨蹟之  
未亡把一麾而東來兮文正之鄉  
喬木蒼蒼兮蘭菲菲  
其彌芳嘉先正之有後兮  
偉德澤之長出帖而歸之兮

甚魏笏之輝煌時不可兮再得勉世世兮珍藏

任士林

鳳求皇

鳳將將求其皇皇既遂辭母旁  
逐皇孔良不與母同翔  
鳳心長海樹涼

姚式

讀水邨隱居記歌

有宅一區兮水之鄉前可漁兮後可耕  
絕輿馬之憧憧

兮魚蝦集兮而鳬鴈翔伊昔寄之圖寫兮猶彷彿而賦  
高唐暨歲晏遂初服兮遇夫人之慨慷維安宅之攸居  
兮何羨乎堂皇爰不耕而獲兮維道之昌我還湖以騁  
望兮懷若人兮不可忘眉壽兮未艾維水兮泱泱

馬祖常

繅絲行

繅車軋伊蠶抽絲桑薪煮水急莫遲黃絲白絲光緹緹  
老蠶成蛹啖兒飢田家婦姑喜滿眉賣絲得錢買纂羅

翁叟慣事罵婦姑只今長男戕葭蘆秋寒無衣霜裂膚  
鳴機織素將何須翁叟喃喃罵未竟當門叫呼迎縣令  
騶奴橫索馬鞭絲婦姑房中拆纊經

拾麥女歌

鰥雉飛桑扈鳴老蠶入簇繭欲成原頭腰鎌者誰子刈  
麥歸家作餅餌心知棲畝有滯穗惻惻忍收寡婦利寡  
婦持筐衣藍褸終朝拾麥滿筐筥兒啼婦悲竈無火寒  
漿麥飯晡時取豈不見貴家妾豈不知娼家婦繡絲繫

襦蓮曳步銀刀鱸魚佐酒杯狎坐酣歌愁日暮拾麥女  
拾麥女爾莫嗟爾莫憂人生賦命各有由前年貴家妾  
籍入為官婢今日娼家婦年老為人棄貧賤艱難且莫  
辭畢竟榮華成底事

古樂府

天上雲片誰翦裁宮中雨絲誰織來蒺藜秋沙田鼠肥  
貧家女婦寒無衣女婦無衣何足道征夫戍邊更枯槁  
朔雪埋山鐵甲澀頭髮離離短如草

淮南田歌

東塘水初滿西塘泉又生春風雨塘側多少路人行  
蒲生亦有筍菰生亦有米可憐芙蓉花照影秋塘裏  
借錢買鹽茶倩人蒔早秧日望秋田熟仍防野鴨傷

淮南漁歌

棹船淮水上曬網赤岸南船中捕來魚賣錢買魚籃  
小艇如鳬鷺湘東柴杉木載家復捕魚夜夜繫江竹  
渡江問魚價人來索酒錢婦姑亦不惡便煮縮項鰻



柳枝詞

郎君巧歌楊柳枝  
柳眉初出學月支  
隋隄千樹煙光暮  
不如柳眉初出時

鳳城三月草色青  
池塘飛絮相飄零  
風吹宛轉低撲人  
長空白日流榆星

竹枝詞

日邊寶書開紫泥  
內臣珠帽輦步齊  
君王視朝天未旦  
銅龍漏轉金雞鳴

金鑪寶熏留篆雲花間百舌啼早春五坊戲馬賽爭道  
傳聲催賜十流銀

竹枝詞

城南牡丹一百本翰林學士走馬來渡水楊花逐飛燕  
翦衣雪影覆春臺

粟侯宅中花一園客來飲酒費金錢明朝碧樹春城合  
恨不江東問酒船

京城南粟侯玩芳亭  
仲淵子於同賞牡丹

北歌行

君不見李陵臺白龍堆自古戰士不敢來黃雲千里鴈  
影暗北風裂旗馬首回漢家衛霍今何用見說軍還如  
裏痛不思百口仰食恩豈念一身推轂送如今天子皇  
威遠大磧金山烽燧鮮却將此地建陪京灤水回環抱  
山轉萬井喧闐車戛輪翠華歲歲修時巡親王覲圭荆  
玉盡侍臣朝紱蟪珠新高昌句麗子入學交趾蠻官貢  
麟角斗米三錢金如土國人謳歌將軍樂將軍樂四海  
清吾皇省方豈田獵觀風察俗知太平

車簇簇行

李陵臺西車簇簇行人夜向灤河宿灤河美酒斗十千  
下馬飲者不計錢青旗遙遙出華表滿堂醉客俱年少  
侑杯小女歌竹枝衣上翠金光陸離細肋沙羊成體薦  
共訝高門食三縣白髮從官珥筆行毳袍衝雨桓州城  
前宛轉曲

紫檀出海南削成琵琶槽上有鴛鴦弦彈曲聲嘈嘈客  
問此何聲新聲名絳桃一奏桃始華再奏花枝斜笑靨

頰暈粉仙源飯蒸霞度作新聲曲春樹雙鶯逐雙鶯擲  
金梭魚藻蕩圓波陌上行車帶結羅絳桃年少光陰多

楊花宛轉曲

空中游絲已無賴宛轉楊花猶百態隨風撲帳拂香奩  
度水點衣縈錦帶輕薄顛狂風上下燕子鶯兒各新嫁  
釵頭燼墜玉蟲初盆裏絲縈銀繭乍欲落不落春沼平  
無根無蒂作浮萍瀾波繡苔總成媚人間最好是清明  
清明豔陽三月天帝里煙花市酒船石橋橫直人家好

小海白魚跳碧藻  
榆莢荷錢怨別離  
不似楊花宛轉飛  
揚花飛盡綠陰合  
更看明年春雨時

公子行

綠香繡帳垂流蘇  
牀頭三尺紅珊瑚  
十八窈窕秦羅敷  
曲房小步璫鳴襦  
高臺公子吹笙竽  
百斛明珠買氍毹  
蘭燈挂漿炙文魚  
但苦不駐羲和車

貢奎

漢劍歌

為吳閑  
閑作

古劍粼粼一泓水高堂脫鞘神光起何年失勢竟飛來  
風雨靈雌泣淵底自從掌握歸山人句連鐵鎖羈煙塵  
山石裂開鳴碧玉土華蝕盡浮蒼鱗天官下勅百靈守  
呼吸雲雷任驅走或云其來由漢始留侯佩從赤松子  
千載相傳有定名造物忘令書太史君不見干將莫耶  
離復合氣衝牛斗森滅沒長鯨掉尾滄海闊

牽舟行

河水沄沄流不已汴流牽船魚貫尾怒風捲地漲黃塵

白日茫迷雾雲起前船纜影百丈微號呼併力行如飛  
後船纜斷勢一失汗身滿足不相及須臾十里迴天風  
舉檣撇柁懸高篷誰知日暮泊處所成功却與前船同  
篙師接語告勞苦僕從亦復譏途窮持樽傲坐且引醉  
悲喜豈足關吾躬君不見何獨人生行與止請君萬事  
推此理

度閘行

新河十里分三閘閘東水奔河勢狹萬里昂昂擁不前



我愁度閘如度峽下閘已開上閘閉牽舟稍前復留滯  
兩髯咆哮氣敵虎擊鼓鳴鑼竟何計低迴却坐同歎嗟  
咫尺攀躋未能至憶昔枝江南賦歸手招五老風生衣  
挂帆一日走千里錦鯨拔尾開煙霏爾來閑身落羈繫  
安得化作孤鴻飛人生百年復何有羨殺津頭老漁叟  
野祠日暮烏鳥啄得魚惟知換村酒故山花木春事深  
迴首漂零不知久明朝度閘舟已東歸來歸來乎山中  
高陽舊徒吾爾從

許有士

應制天馬歌

臣聞聖元水德正色在朔方物產雄偉馬最良川原飲  
齧幾萬萬不以數計以谷量承平雲布十二閑華山百  
草春風香八聞有駿在西極權奇倣儻鍾乾剛茂陵千  
金不能致直以兵戈勞廣利當時紀述雖有歌侈心一  
啟何由制吾皇慎德邁前古不寶遠物物自至佛郎國  
在月窟西八尺真龍入維繫七逾大海四閱年灤京今

日才朝天不煩翦拂光奪目正色呈瑞符吾元鳳髻龍  
臆渴烏首四蹄玉後罄其前九重喜見遠人格一時便  
勅良工傳玉鞭錦韉黃金勒瞬息殊恩備華飾天成異  
質難自藏志在君知不在物方今天下有道時絕塵詎  
敢稱其力臣才罷駑亦自知共服安輿無憂軼

蒲道源

新麴米酒歌

梅隱先生命  
作就為壽

驕陽行空勢方烈刈麥農夫寧憚熱天旋雷動飛玉塵

霧渤雲蒸成麴蘖麥秋方罷還插秧攪極西風千頃黃  
腰鎌肩擔行相逐共趁晴色催登場碓舂糠粃光如雪  
汲泉浙米令清潔炊糜糝麴同糅和元氣絪縕未分裂  
甕中小沸微有聲魚沫吐盡秋江清脫巾且漉仍且飲  
陶然自覺春風生君不見淵明有田惟種秫醉裏作詩  
聊自述又不見幽風十月穫稻忙春酒介壽俱徜徉但  
願年年遇豐稔更須三萬六千場

文矩

九疊屏歌

吾聞匡山雲錦九疊之勝神所棲界天絕壁雲為梯鳥  
飛摩霄注壑不可到上有泰始之積雪下有歷劫之冰  
澌靈岫仙巖虎豹遠綠樹杳杳青猿啼蔡元君騰空子  
今何處桃花石室徧巖戶捫箕歷軫欲上去轉迷中有  
神君指仙路石梁浮空來浩然啟天關手捫五老頂足  
躡香爐煙但見飛霞笑電搖光九道疊雲錦天河中斷  
摧鐵山何巖葉素浪決出崑崙巔縣流一瀉數千仞跳

珠迸出與石恣鬪却上倒作雪濤翻長松吹香灑晴霧  
玉泓直下含清寒嗚呼安得南箕為杯此水為酒手攜  
雲旗喚王母排獻吾君千萬壽暢皇風包九有七十二  
君同不朽卻容三十六帝有外臣盡乞南山種三秀清  
水黃塵一回首廬君此意今知否

郭天錫

明妃曲

君不見王昭君家住子規啼處邛生來近住離騷國悲

歌慷慨惡離羣  
紉蘭結菰佩  
蘅芷澤潁面  
薇骨熏瑤琴  
憤識九歌譜  
懷感遠道偏消魂

揭祐民

河南王孫南谷平章詞三首

河之水波漣漣見世澤  
兮往中流夾日焜耀兮為國伊  
周保合元氣兮春陽和柔  
功有紹兮名長留

揚之土春煦煦美有濟  
兮世此所薦生良弼兮為國申  
甫輔翼治道兮還龐復古  
猗其人兮袞是補

會稽之月下照禹穴履海島兮被吳越勤勞王孫兮秉  
玉節為國南鎮兮地固觸蓄彰舊聞聲烈烈

繡婦行

迴文未動機心忙幼時學刺雙鴛鴦漸摹小景作蘆鴈  
稍引初智成磨麋幾回停線望長晷年深勾撥入教坊  
宮羅裁就繡御用伴伍推讓尊前行一絲欲理三滌手  
龍鳳密湊雲分光臂垂枯木挂猿狖眼注寒水明鷺鷥  
瘖瘖蜩蟬殼未脫櫛櫛蠶腹絲為僵晴天日杲等餘事



清夜膏繼爭毫芒鳴機裂下裯忽解擗擗一弗聲聞廊  
千秋萬歲奉聖王若比倚市真誰強

柳林詞

御柳擺綠春風前帝策飛龍舉玉鞭大蒐道合三千年  
獸之所同三矢捐後車載者當誰賢

虞人得意勤張羅四入騶囿獸靡他雪鷹騰擊認鵬過  
下掠鴈驚空駕鵝聖皇祝網仁心多

穹林熊豕驅若馴五羝一發方肥春封狐狡兔不足論

麝香女麝當美珍偶獲慎勿傷麒麟

臣生涉獵詩書林鬻熊已老空遺心  
鸚鵡飛卑下魚潛沈  
有味不中庖經歆無復能發長楊音

李材

懸瓠城歌

我經懸瓠城試作懸瓠歌殘灰五百載懸瓠不復我有  
唐中葉失馭將退辱進危多詆謗淮西孽雖手指天百  
萬官兵不敢傍長安市上晝殺人司隸走藏魂膽喪晉

公一語破紛紜意斷心謀神莫抗諫書不到雙闕下詔  
檢初成九天上煌煌日月煥斧節慘慘風雲動鞬韞殿  
前虬虎神策軍愬武通顏分玉帳夜深雪花大於壁懸  
弧城頭血埋仗寒威方勁弓百鈞淨影不搖旗十丈已  
囚楔猢猻山更沸再戮鯨鯢海無浪蔡人不識緋衣兒  
氣磨天大丞相方城大將拜道左犀甲金戈光炫晃  
毚毚衆五十秋白日青天破昏障兒童不遣避介冑婦  
女爭來沽綠釀入朝論功功有差晉公之功無與讓英

雄事往名器虛栗斯嚅唳意相尚外藩跋扈驕將侮中  
禁深嚴嬖臣誑山東何啻百少陽秦苑洛陽隨板蕩我  
歌懸瓠辭歌聲頗悲壯嗚呼唐之覆車將誰尤後人弔  
古徒哀愴懸瓠城下流水流懸瓠城邊牧笛唱懸瓠歌  
歌已終君不見豐碑野火化為土悵望文公及晉公  
何中

漢宮春

君不見漢宮六六多佳麗露花半染雲裾翠少翁招得

夫人魂孤驚夜啼月波墜趙家姊妹專風流雙蛾不識  
人生愁夫容並蒂歎一朵西風青鳥徒離憂飛龍翩翩  
上天去雲幕椒房土花雨墮膩埋臘恨未消香魂尚寄  
寒莖舞人間炎日焦衆芳肯隨葵藿來傾陽柔情幽怨  
透地脉煙幃寂寞彊成妝誰吹舊曲緣雲切寸寸婉婉  
應愁絕綠羅幾疊御賜衣紅綃半點守宮血淒兮媚臉  
棲餘妍遙憶羊車望幸年至今一片巫山雨化為飛煙  
空潜然故家陵苑孤雲外綠樹如雲草如海殷勤唯有

虞美人同向牆陰弄晴靄

春怨

洛人傾國賞牡丹東家繡轂西家園黃鸝紫燕新得意  
柔雲如酥花迷魂遊人寂寂歸何處花亦年年占風雨  
江南却遇李龜年蘇州空感揚開府誰吹玉笛斷人腸  
斜橋淺淺流水香惟有十年老銅狄看盡人間幾夕陽  
天女手翦五色雲鞭雷控電行青春散作江南萬錦繡  
燭龍眩轉空無塵燕兒眼寒心更苦吳娃情酣夢無據

依然錦繡化為雲却恨風來挾雲去十二樓邊芳草多  
知今鸚鵡聽誰歌千金買取新豐酒地久天長耐樂何  
高四時歌

春風東來汎幽谷出門一笑人間綠新雨池塘柳帶鶯  
嫩雲洲渚沙眠犢一簑一笠東西邛天高地下斯人存  
歸來醒醉聊隨意翠樹無言花滿門

陽烏炎炎焦九土老農吁嗟氣如縷山中神化出移時  
一片閒雲半溪雨誰家金谷有涼臺葵扇桃笙爭自媒

清風却在長松下不須用智不須才

楊柳磯頭天萬里長笛一聲風不起翠灑千峯日映煙  
清涵雙澗霞通水季鷹底事却思歸豈是鱸魚輕別離  
晚知北悔又何益灣頭釣竿君好持

寒鴉萬點落葉赤山風蕭蕭野日白池上梅花俱有情  
林間茅舍元無客人言梅花知歲寒花亦偶然冰雪間  
向來羣芳今欲盡蘭芽已動春將還

車碌碌



車碌碌車上行人雪中宿三更驅驢聲陸續頓撼肝腸  
眩心目霜稜飛刀風激鏃荒郵無煙抱空腹索駝不收  
馬成簇暗裏低心避羣牧望斷海光上東旭木末天低  
星煜煜

長風沙

長風沙酒旗斜風沙有情留郎住勸郎莫向前江去前  
江去轉風波牛渚圻邊須過得黃天蕩裏奈郎何郎船  
但繫門前柳唱曲好歌勸郎酒與郎不是平生親憐郎

却願郎長久郎今必去當何為教郎解有思人時

山碯碯

山碯碯石确确一灘翻下一灘惡青衫黃帽扶招竿鉤  
鋒如戟波心攢打槳失手能盪過扶竿失眼船隨破三  
山城中女如花高樓酒賤多魚鰕荔支林中尋屋住上  
灘難轉莫歸去

黃氏南園歌

南園花南園花白於雪紅於霞深處定有仙人家花陰

亂駐七香車山香儘舞花不老花豔直上搖金鴉瓊膏  
一吸香入骨醉呵金鴉不令斜南園竹南園竹寒於冰  
綠於玉割得何人土一丘炎官雖炎誰敢酷天山太古  
雪皎皎蓬萊絕境風肅肅白鶴翻空啼一聲下占清陰  
對碁局君不見古南園錦茵紅皺琵琶弦珊瑚碧樹沈  
水煙嘉賓列坐鼓咽咽白石詩句吟成編放翁記文筆  
如掾挾策博塞若為賢撫掌一笑晚青天不如花竹之  
間吸清泉且取粟粒香芽煎

山中樂效歐陽公

東方風回春山道趁暖行歌霽華早溪源露歇逢樂苗  
石徑煙輕掇芝草紅英灑地燕將乳綠樹添陰鶯未老  
入簌魚鰕朝赴饌頃筐筍蕨夕供芼山中之樂誰得知  
我獨知之來何為水竹沙頭閒檢校邨邨簫鼓太平時  
堤柳綠搖新罨畫石榴紅摺嬌裙衩蓮蕩風閒翡翠欹  
菱塘雨定鴛鴦下溪女浣紗朝出邨行官飲水暮歸舍  
瓦餅手挈隔年醅石下坐圍明月夜山中之樂誰得知

我獨知之來何為空裏烏蟾飛影過桑麻課效勝書帷  
空山一夜生新雨涼起賞心千萬緒扇團自守不依人  
桐葉知幾尋脫路隔隴笑談雜樵牧臨流賓從惟鷗鷺  
旋庖蘆菰美勝酥精浙新杭香滿戶山中之樂誰得知  
我獨知之來何為青林紅樹人煙濕護得金橙密處垂  
千花重作陽春節野杏山桃隨處發莫思前度看花誰  
已見新墳芳草歇穆山山下數灣月華山山厓千丈雪  
幽人獨在雪月中要與梅花成四絕山中之樂誰得知

我獨知之來何為除却山家新臘醞世間無事可相宜

三仙謠

紅紗籠玉香金翠繡鴛小鶴頂壓青絲斜戴花枝裊何  
方馬上郎下馬佯驚悄羅扇掩微頰答語相縈繚郎有  
千金重妾惜容華少怕不稱郎心看郎幾曾老

主禎

艾麥歌

田家食力不食智薶麥年年勤種蔣老農八十諳地利

暑夏呼兒先嘆地再耕再耨土華臆手把耨犁知己試  
土沃不妨投種穧今年已報春澤被覆壠苗深如擲比  
薰風長養見天意獵獵青旗催穉穗纔結稃花雪墜  
赫赫曦輪熾鑽燧儘著精華輸至味粒飽芒森密如篲  
頓失前時浪翻翠豈知真宰調元氣化作黃雲表嘉瑞  
老農眼飽雖自慰旦夕却憂風雨至子婦犇忙事芟器  
鈔綽翩翩轉雙臂曳籠腰間盈復棄急載牛箱夜無寐  
轉首登場簇高積風翻日碾半猶未已向公門奉新餽

麴材和糴凡幾次年餉巡門仍語諄夏稅有程今反易  
自餘宿負如取寄指此有秋爭蟻萃一得豈能償百費  
終歲勤勞一歔歔昨日公堂宴賓貴尊俎橫陳混肴載  
檀板珠繩按歌吹萬錢不值供一醉庖人搓揉出精粹  
尚喜食新誇餅餌物不天求皆力致飽食何人知所自  
春祈夏薦禮所記報本從來追古義但願斯民不畏吏  
吏不擾民民自遂凡在牧民遵此治坐見兩岐歌政異  
日富困倉均被賜不使老農憂歲事



虞集

步虛詞

步虛長松下流響白雲間  
華星列燿火明月懸珮環  
肅然降靈氣穆若愉妙顏  
竹宮愴清夜望拜久乃還  
朱光出東海高臺迎赫曦  
六龍獻陽燧九鳳包金支  
鍊丹軒轅鼎濯景崑崙池  
拜賜冰玉佩元洲共遨嬉

日出行

日出上城府日暮當早歸  
城門已擊拆出郭何焉依  
下

馬投館人空垣月當扉涼風振庭樹巢鳥屢驚飛起坐  
搔白髮忽如霜草稀周公不復夢仲尼故沾衣老萊有  
孺色傳聞惟食薇求之事已晚徘徊行道微

白翎雀歌

烏桓城下白翎雀雌雄相呼以為樂平沙無樹托營巢  
八月雪深黃草薄君不見舊時飛燕在昭陽沈沈宮殿  
鎖鴛鴦夫容露冷秋宵永芍藥風暄春晝長

竹枝歌

沙禽東去避網羅  
蕩舟相逐如遠何  
越山青青越女白  
從此勞人魂夢多

春江風濤苦欲歸  
東盡滄溟南斗低  
明年白日百花靜  
憶爾琴中烏夜啼

燕姬當爐玉雪清  
簫中吹得鳳凰聲  
不及晴江轉柁鼓  
洗盞船頭沙鳥鳴

江樓看劍歌

豫章高秋宴高閣  
乃出此劍相娛樂  
當時冶鑄絕精英

土蝕沙沉更銷鑠遺質所存如冷電江光不與晝光却  
神光內悶氣逾深識察誰能動冥漠等閒千年不一試  
壯士酣歌謾揮霍嗟予衰朽雪滿顛空對涼風起天末  
或言江中有蛟蜃當煩仙人下寥廓吾故臨風拂其鏐  
俾伏崖陰無敢作

吳中女子畫花鳥歌

吳中女兒顏色好洗面看花花為俏調朱弄粉不自施  
寫作窗間雪衣鳥綠窗沉沉春晝遲半生心事花鳥知

花殘鳥去人不歸  
細雨梅酸愁畫眉

東家四時詞

臨流洗硯見長身  
白苧寬衣短葛巾  
紈扇自題新得句  
水亭分送倚闌人

摩挲舊賜礮龍團  
紫磨無聲玉井寒  
鸚鵡不知誰是客  
學人言語近闌干

澄波千頃擁高鬟  
手折芙蓉月下還  
解憶高堂風露冷  
衲衣先送碧雲山

賀雪宮門上表歸貂裘猶帶六花飛  
海南新送收香鳥  
轉覺清寒入翠帷

楊載

古牆行

建炎白馬南渡時  
循王以身佩安危  
疏恩治第壯輿衛  
縮板栽榦繇偏裨  
下錡江城但沙鹵  
往夷赤山取焦土  
帳前親兵力如虎  
一日連雲興百堵  
引錐試之鐵石堅  
長城在此勢屹然  
上功幕府分金錢  
謹聲如雷動地傳

爾來瞬息逾百年高崖為谷驚推遷華堂寂寞散文礎  
喬木慘淡棲寒煙我入荒園訪遺古所見惟存丈尋許  
廢壞終嗟麋鹿游飄零不記商羊舞王孫欲言淚如雨  
為言王孫無自苦子孫再世隳門戶英公尚及觀房杜  
如君百不一二數人生富貴當自取況有長才文甚武  
公侯之後必復初好把家聲繼其祖

神馬歌

神馬來自崑崙西有足未始行沙泥朝趨欲出飛鳥上

夕逝直與奔星齊綠髮半散插雙耳赤汗交流攢四蹄  
風神秀猛陜天地豈顧燕蔡并渠黎時時牽浴臨清溪  
對人誇殺黃須奚玉沙之禾中芻秣不啮隄頭枯草稊  
與君側耳聽長嘶凡馬不聞生駉駉

古劍歌

閑閑真人藏古劍敬之如神不敢忽賓客時來求一觀  
輒有悲風起倉卒人言此是金鐵精良工煅煉久始成  
動搖天地合變化摩蕩日月含光精昔年有蛟起江中



口吐烈焰燒長空下民昏溺上帝怒雷電往擊皆無功  
嘗持此劍斬蛟首流血滔滔浸廬阜傳記傳聞時既久  
不意世間今尚有吾過下里多惡氛魍魎魑魅能食人  
請君為我絕此怪一洗宇宙長清新

西湖竹枝詞

西子湖邊楊柳花隨風飄泊到天涯青春遇著歸來燕  
銜入當年王謝家

一種腰肢分外妍雙眉畫作月娟娟春風吹破襄王夢

行雨行雲若箇邊

范梈

杏葉黃

杏葉黃天雨霜穹窿攜日照八荒  
回光照見白玉堂堂  
中美人雙鳴璫中宵抱被直西廂  
忠君愛親兩不忘  
奈何零露沾衣裳清曉樓頭見征鴈  
不如謝官歸故鄉

輓轡怨

門前水揚聲似雨幽人當窗碧絃語  
東里征夫去不歸

一雙蛾眉鏡中舞年年井上攀轆轤勞心只恐秋葵枯  
他家種得長生草梅花落盡青青好

至日行

長安夜半通明光羣公冠佩列鴈行泰壇三成樂萬舞  
布衣類得齊鳴璫小官需次祇自賤當日再拜謝日長  
多少朱門圍豔質何當起視東方白

官河曲

官河人世居河水邊嚴冬二月河冰堅響厨待汲烹庶

鮮朝朝投壺先衆女十指凍墮貂金蟬今日出門又苦  
早行人爭惜少夫憐鑿冰難得水  
上堂養姑欲姑喜

揭傒斯

女兒浦歌

女兒浦前湖水流  
女兒浦前過湖舟  
湖中日日多風浪  
湖邊人人還白頭

大孤山前女兒灣  
大孤山下浪如山  
山前日日風和雨  
山下舟船自往還

貧交行

驅車涉廣川揚帆陟崇丘  
結交四海內中道多愆尤  
朔風厲苦節獨鶴橫九州  
朝拂三島樹夕過五城樓  
兩翅偶寒影曠然何所求  
登高臨大江日暮萬里流  
時哉疏鑿人八年忘外留  
出必益稷俱歸與夔龍儔  
進退兩不疑功成垂千秋  
萬事日相斂恩情若雲浮  
吾心苟不渝反覆安足仇  
自非天地外何能獨忘憂

何郎失鏡詞

團團如月不曾虧家人親置枕中時朝朝將正頭上幘  
時時攜鑷鬢邊絲古文宛轉何人造失來始覺今難討  
街頭不直半緡錢古銅終較今銅好向人不敢再三尋  
客裏空疑同舍心萬里相隨一朝別夜夜還瞻天上月

漁父詞

夫前撒網如車輪婦後搖櫓青衣裙全家託命煙波裏  
扁舟為屋鷗為鄰生男已解安貧賤生女已得供炊爨  
天生網罟作田園不教衣食看人面男大還娶獻家女

女大還作戲家婦朝朝骨肉在眼前年年生計大江邊  
更願官中減征賦有錢沽酒共醉眠雖無餘羨無不足  
何用世上千鍾祿

高郵城

高郵城城何長城上種麥城下種桑昔日鐵不如今為  
耕種場但願千萬年盡四海外為封疆桑陰陰麥茫茫  
終古不用城與隍

孤雌行為鄆城節婦作

有鳥有鳥雌雄相追哺雛未飽鳴且飛雛未長雄乃死  
子亦隨朝朝暮暮惟孤雌長林廣野風日美步步不敢  
離故棲燕雀掠颺差復池迴身側腦遞相欺誰憐孤雌  
心到死終不移更有許州鄆城徐氏母一生抱恨守空  
閨

結羊腸詞

正月十六好風光京師女兒結羊腸焚香再拜禮神畢  
翦紙九道尺許長撚成對綰雙雙結心有所祈口難說



為輪為鎗恒苦多忽作羊腸心自別鄰家女兒聞總至  
未辯吉凶憂且畏須臾結罷起送神滿座歡欣雜顚顚  
但願年年逢此日兒結羊腸神降吉

雲錦溪棹歌

雲錦溪中雲錦鮮好在高秋八月天西蜀錦江那得似  
西湖綠水更須憐

纔過浮石是藍溪溪上青山高復低山中泉是溪中水  
尋源直到華山西

藍溪南去到藍洲水底蘄蘄石不流迴望朱宮雲霧裏  
白雲深處更高樓

宮前梨浦白茫茫岸上人家不似牆能到此中還有幾  
行人莫厭棹歌長

挹仙亭下薛公橋紛紛抵暮更連朝惟有橋西楊與柳  
無情長繫木蘭橈

溪上層層雲錦山垂楊盡處是龍灘不是孤舟來逆上  
何人知道世途難

賦得吳歌送人歸吳中

三月酒如澗高堂絲竹停繡筵雙鳳影珠箔亂鶯聲疊  
應紅牙拍辭傳金縷名綵雲低不度芳塵暗自驚花發  
長洲苑日照闔閭城且奉千金壽寧忘萬里情

御選元詩卷三

欽定四庫全書薈要卷一萬八千四百十六

集部

御選元詩卷四

樂府歌行三

黃潛

可憐行

紅顏白面可憐子  
杖藜飢走荒山裏  
翠眉新婦雪色兒  
掩袖嬌啼瘦如鬼  
道傍朱門照霜戟  
腸斷汝翁呼不起  
金魚象笏供擣搗  
紉袴終然愁餓死  
春風秋月哀思多

嗟汝少年奈老何

柳貫

六月十五日大雨雹行

是日  
月食

日月相鬪鶉火中  
晡時欲息雲埋空  
雨脚初來雜鳴雹  
雷驅電挾聲淪淪  
排簷倒檻揮霍入  
犀兵快馬難為雄  
中休頗意絕崩迸  
轉橫更覺加鋤鋒  
亂拋荆玉抵飛鵲  
恣擲桃核隨飄風  
坐移向壁防碎首  
急卷巾席何息息  
上天號令豈輕出  
摧殘長養皆元功  
陰凝陽爍鬼神著

氣有至反誠則同想茲試手鼓萬物特欲振槁昭羣蒙  
齋心變貌謹天戒嗚呼生意無終窮

梁谿謠贈盛高霞道士

梁谿一片月搖蕩綠蘿煙玉女採珠回駕龍耕壁田春  
去竹花實歲深芝草駢鳳凰招不下遲景惜留連却望  
白雲嶠明星正當天雲中青童君招麾使之前謂言寶  
訣書列在瑤臺編蚩尤守局鑰一閱三千年至今海嶽  
間光氣常蜿蜒茅龍亦解飛金匱豈徒堅引手探元策

得之可登仙首路向恒碣西窺臨嶽蓮天壇見日出皓  
鶴共蹁躚行攀飛狐塞回薄扶桑淵滄溟挹不滿石廩  
小如拳還尋屏風疊鼓柁陵中川調笑呼陸羽濯纓第  
二泉但聞丹齊成不見朱顏遷顯露薦承液雄虹為采  
壇上下入景中窅然觀化先何必肩洪崖遂將儕儻全  
寧能獨不死為我啟真筌大還容草創小劫度沉綿桂  
枝倘堪結遲贈遠遊篇

松雪老人臨王晉卿煙江疊嶂圖歌



君不見帝堦王家寶繪堂山川發墨開洪荒重江疊嶂  
詩作畫東坡留題雲錦光又不見後身松雪齋中叟伸  
紙臨摹筆鋒走樓臺縹緲出林坳蘆葦蕭騷藏澤藪白  
雲飛不盡青冥百丈牽江入樊口墨花照几射我眸我  
為騷芳歌遠遊胸中是物有元氣世上何所無滄洲我  
疑此叟猶未化瞬息御氣行九州五山四溟一觴豆瑣  
細弗遺囊楮收故能援毫發天藻不與俗工爭醜好楚  
山雲歸楚水流萬里秋光如電埽拈來闌董散花禪別

出曹劉斲輪巧披圖我作如是觀毛穎陶泓共聞道嗚呼相馬亦相人駑駘豈得同翔麟舍夫毛骨論形似如此鑒賞焉能真後來有問延祐脚意索舉似吾方歎

商學士畫雲壑招提歌

并序

諸生裕魯布哈嘗從其父官洛下強學好修得於山川之助者也集賢侍讀學士商公見而器之為畫雲壑招提以贈乞予作歌公此圖意韻閑遠生能求之筆墨之外將不由是而有發乎

高為巔峯下為壑羣木慘慘風欲作浮紅動翠何許似  
別崦殘雲明佛閣眼中疑此洛南山只尺便到龍門灣  
暗潮已落洲渚出新月未上漁樵還商侯胸有羣玉府  
借酒時時一軒露延春閣下墨淋漓餘情亦及滄洲趣  
好山好水如高人豈直貌敬將心親平生幾夢奉先寺  
不知猿鳥猶相嗔君不見飲酒吟詩狂太白曾是匡山  
讀書客泥塗失脚走憧憧歲晚看雲情脉脉生今益壯  
業益修未可造次思巖幽披圖讀墨歌遠遊我無桓元

寒具油

卷四

僧傳古躡霧出波龍圖歌

葉公好龍致真龍精氣所感無不通僧中劉累有傳古  
夜夢捷入驪龍宮陽暉焰焰陰魄動左右給侍皆魚蟲  
探珠不得逢彼怒轟然鼓鬣興雷風潛窺竊識領其妙  
寫之萬楮將無同目睛數月纔一點波浪只尺如層空  
乘雲執鏡麾雷母跨海獻寶招河宗劉嘗善泰古善畫  
得意忘象象乃工為龍為畫了不識有頃嘆水投長虹

龍乎龍乎德正中超忽變化天為功絳宮帝子秉節從  
九淵喚起赤鯁公永奠鰲極開鴻濛

灤水秋風詞

朔方竇憲留屯處上郡蒙恬統治年今日隨龍看雲起  
八荒同宇正熙然

朶樓清曉常祠罷吾殿新秋曲宴回御帛功由寒女出  
分頒恩自九天來

西風初吹白海水落日正見黑山雲旃廬小泊成部署

沙馬野駝連數羣

後灤水秋風詞

界牆窪尾砂如雪灤河觜頭風捲空  
泰和未必全盛日  
幾驛雲州避暑宮

旋卷木皮斟醴酪半籠羔帽敵風砂  
丈夫射獵婦當御  
水旱肥甘行處家

山郵納客供次舍土屋迎寒催墜藏  
砂頭蔴姑一寸厚  
雨過牛童提滿筐

北山招隱詞題李卿月小隱圖

煙雲竒彩稜稜見水木高齋面面開  
畫裏青山雖甚似夢中元鶴幾曾來

拚攔布葉尋常大畧約通溪取次斜  
誰送茶煙來北崦却留梅月在東家

但歲蒼松驚出屋度秋黃葉看成堆  
賴憑故篋書千軸領取虛名水一杯

此圖盈尺山論文何處看雲水自空  
幸自冰壺堪作傳

莫憂瑤草未生叢

洪州歌

豫章城西江上舟  
船翁夾柁起紅樓  
官鹽法茗有饒乏  
市利商功無筭籌

舊坊馬齧誤驚眠  
新水魚來聽賣鮮  
詫說閑曹無一事  
閤前小吏送餐錢

厭原山上雲封頂  
谷鹿洲前水作文  
老向江城收物色  
洪崖仙子舊知聞



騰騰寶氣貫天中一劍西飛一劍東化作城南鎖蛟柱  
人言下有支祈宮

東湖水滿葑雲開掠取煙光雨色來未放官絲興畚插  
且從魚樂占池臺

相國臨邊節制高春城小隊簇旗旄日開南粵無拒命  
翡翠生犀數貢毛

秋屏閣上看西山每到須撩薄暮還豈有珠璣資簸弄  
祇教塵土羨蕭閑

萋蒿鮮滑勝雞酥  
滿尺河豚玉作膚  
漫說江鄉美庖傳  
幾曾風味似蓴鱸

諸使官名小字題石幢  
今在驛垣西當時得託大手筆  
岐陽十鼓與之齊

圃塍新雨得春多  
幾箇閒人載酒過  
夾徑金沙編作障  
懸根翠柏種成窠

女兒頭戴角冠欵  
盦葉垂垂彈髻齊  
十里來城肩擔重  
新晴菜把賤如泥

舊聞雙井團茶美近愛麻姑乳酒香不到洪都領佳絕  
吟詩真負九迴腸

中男十五學棹謳大男前年能競舟辦作神筵賽寒食  
併將犀炬照潛蚪

吳萊

黑海青歌

越山山有黑海青長拳快眼健羽翎三年籠養未得飽  
萬里驍俊猶飛星黃蘆老葦日摧折白鷺文鷁看磔裂

腥沾石磧久遠風髓擊寒岡散輕雪伊人脫手本凡禽  
歲晚連條到上林鉗奴素賤多侯骨騎士虛豪即使心  
晉宮邸廢身欲死燕國雲銷草如砥嗟非鸞鳳高杳冥  
望盡狐狸衆披靡當時奉使探遠巢兩徼馳兵聞勇鑒  
南土誰知此鷙猛北州驟見爭驚號天鵝薄天垂爾翼  
海青雖黑打可得太平八極無不通函谷何問關西東

挽珠伎

挽珠聞自宮掖來長竿寶挽手中迴日光正高竿影直

風力旋空珠勢側當時想像鼻生蔥宛轉向額裁笑容  
筋頭交筋忽神駭矛葉舞矛憂技窮昔人因戲存戒懼  
後人忘戒但戲豫漢朝索撞險還愁晉世栻梓危不寤  
徘徊徘徊奪目睛款款傾傾獻玉璫滑涎器從龍堂出  
輝燿命與鬼骨爭君不見王家大娘材藝絕勤政樓前  
戴竿折市人謹笑便喧城驚動金吾白挺聲

白鼻騮

白鼻騮白鼻騮當軒迴立噴風沙名驥留良定北土蹇

蒙索價猶東家青松縛柳曉安阜紅錦裁韉春映草支  
遁心機愛神駿伏波骨力輕衰老去年禁馬無馬騎天  
下括馬數馬皮浮湛鄉閭萬里足笑傲品秩千金羈幸  
哉漢武重修政往矣劉聰真覆鏡立防戰備要馬稀藏  
富民寰須馬盛向來河隴色為羣目極川原亂若雲庶  
人徒行未足恤世間醇駟何由得

鞦韆行寄趙季良時趙留京邑

京城寒食來沽酒城北城南映楊柳人家歡笑踏鞦韆

杏板絲繩相對懸宮錦翻衣真富貴俗軀走肉盡神仙  
徘徊宛轉當風立春晚多風吹汝急鞦韆已墜蹴鞠空  
華鑣翠鞍擁青驄軒轅臺前日月近無終國裏山川同  
遠方羈旅紛馳逐燕趙佳人美如玉燕歌趙舞歡未足  
去年芳草今年綠

女殺虎行

山深日落猛虎行長風振木威鬚鬣父樵未歸女在室  
心已與虎同死生揚睛掉尾腥滿地狹路殘榛苦遭噬

豈非一氣通呼吸徒以柔軀扼強鷙君不見馮婦來下  
車衆口無人尚負隅又不見裴將軍出鳴鏑一時鞍馬  
俱辟易丈夫英雄却不武臨事超超汗流雨關東賢女  
不足數孝女千年傳殺虎

烈婦行

落日沈海雲壓城官軍多載婦女行大弓勁箭自山下  
顏色如灰愁上馬我生不慣生馬駒存者吾子亡吾夫  
母寧完身吐玉雪忍使餒肉當熊羆青楓嶺頭望回浦



血指畫巖心獨苦老螭扣地救未及芳草迷天淚零雨  
卓哉一死可百年此事已過永泰前黃沙野塞多降骨  
忠義傳中收不得

吳師道

促織吟

高秋白露如零雨促織驚寒近牀語美人不寤空閨深  
共向西風訴離苦玉關征人去不歸無書寄與來鴻飛  
背壁孤燈照清淚誰家急杵敲寒衣寒衣八月當寄時

今年獨恨衣成遲  
天吳顛倒舊繡裂  
春蠶凍損新絲稀  
夜長抱膝三太息  
此懷促織那能知  
微霜淒淒月欲沒  
四壁蕭蕭聲轉急  
唵成錦字長相思  
萬里秋空凝愁碧  
殺虎行

蘭溪太守今劉昆  
癡虎有耳胡不聞  
夜深安尾古道上  
日暮搏犬荒城根  
風吹黃茅走白額  
獵夫一見懽踴躍  
亂刃交揮白雪翻  
雙眸怒迸金丸落  
後車傳送如獻俘  
當軒裂肉空須臾  
長河無蛟惡黨靜  
里中三害今何如

平生意氣多豪野亦欲短衣馳匹馬一掃腥魂險穴空  
長歌慷慨南山下

落花行

東風吹花花作團美人脉脉凭闌干倦投紅筵逐舞鳳  
故尋翠袖縈釵鸞去年送別城南道城南飛花映芳草  
關河萬里人未歸風雨一番春又老抱愁無語還空閨  
拂釵攬袖香依依綠陰鎖窗蝶影斷空枝弔月鶻聲悲  
青春不復回游子不顧期美人掩淚長相思恨身不似

花能飛花飛終恨沾塵泥安能與花飛去陽關西

苦旱行

五月苦旱今未休青空烈火燔新秋雨師不仁龍失職  
百鬼廟食茫無謀我欲箋天訴時事只恐天公亦昏睡  
蒼生性命吁可哀風雲何日從天來

皇天不雨一百日千丈空潭斷餘涇連山出火槁葉黃  
大野揚塵烈風赤田家父子相對泣枯禾一莖血一滴  
中夜起坐增百憂雲漢蒼蒼星歷歷

吳鄉白波田作湖越鄉赤日溪潭枯衾裯不換一斗米  
細民食貧衾已無連艘積廩射厚利烏乎此曹天不誅  
閩道閩中米價賤南望梗塞悲長途

落葉行

山窗獨眠抱秋冷四壁無聲中夜醒天清急雨忽萬點  
月出枯蛇紛衆影開門颯颯非故林滿空亂葉搏愁陰  
石澗流紅百泉咽蘚痕掩碧孤蟬吟高秋共誰聽蕭瑟  
却憶江南遠遊客楚天搖落白日高萬里扁舟蕩秋色

江南客來歸山中葉亦稀相思繞徧寒樹下有恨願隨  
秋風吹山空夜寒風漸微慘慘霜露沾人衣哀鴻獨叫  
殘雲飛

燕子行

清江朱樓相對開去年燕子雙歸來東風吹高社雨歇  
一日倏忽飛千回翻身初向煙中沒掠地復穿花底出  
花飛煙散江冥冥城郭參差滿斜日無情游子去不還  
短書寄汝秋風前繡簾不卷春色斷空梁泥墮琵琶絃

飛檣冉冉瀟湘浦春盡天涯路修阻一夜相思柳色深  
獨上樓頭淚如雨

歐陽玄

春閨怨

東風園林花草香芳閨寂寞春晝長佳人獨守情默默  
銀牀錦被閑鴛鴦終朝倦繡拈針指怕向花前聽鶯語  
喚回舊事千萬端杏臉蛾眉淚如雨玉郎去年辭家時  
綠楊紅杏嬌春暉綠楊紅杏色如舊悵望玉郎猶未歸

一春魚鴈音書絕  
雪膚消瘦千腸結  
斷腸獨立幾黃昏  
那更青山苦啼鵲

和李溉之舞姬阮鞵吟

宮袍繡蹙金花綺  
紅綃緊襯雙鸞尾  
盈盈慢服舞腰輕  
綵雲飛處香風起  
藕絲掣斷春雲鬆  
瑞蓮雙結並頭紅  
天天曲曲玉彎卷  
翠鳬飛去天欲輓  
玉階秀茁蘭筍長  
瓊沙迸出蘆芽淺  
徘徊困倚東風力  
溼砌香雲墜無跡  
無限嬌羞不自持  
君王喚起扶花立



題紫微老人大字歌

紫微老人射生手挽強竟取黃金斗驃騎營中拜驍勇  
鳳凰池上稱耆舊時平腕力無所施筋力猶能學顏柳  
縱橫戎略結構體殺活兵機屈伸肘山莊劉氏得最多  
當日檐榆駐應久高樓大扁曰明遠況有愛山并尚友  
我來後公五十年主人酌我樓中酒平田野水鳬鴈集  
重岡複嶺蛟龍走登高欲賦乏佳興忽覩台躔照窗牖  
家藏有此希世珍取酒當為主人壽想當洗硯攷筆時

羽簾生風劍龍吼馬知今人正傳玩名與麒麟同不朽  
嶠南鼂鼂十五秋老將如今安得有鄂公九原如可作  
養壽清商為公奏

陳泰

題趙子昂畫馬歌

九原駿骨埋地中一夕盡化霜皮松畫史刻松作神墨  
掃出騏驎帶松骨煙沙漠漠披風髮精氣炯炯房星同  
天山無人草木白西極日沒黃河東時平使汝困轅軛

不得變化騰為龍黃金擲送燕臺下當日君王惜高價  
自從汗血去人間老死英雄空見畫十年祇說曹將軍  
弟子韓幹終無聞今之畫者趙翰林嗚呼三晉賢子孫

秋江釣月圖歌

并序

秋谷李平章所善客鄱陽葉天文隱居不仕其行  
卷曰秋江釣月圖同年魯伯昭克呼濟蘇贈之以  
詩屬余次韻

青蘿斷岸苔如髮天清水落魚龍窟中有江南漫浪翁

獨棹秋江釣明月秋江月白芙蓉深扣舷夜和江神吟  
不須槎上泛牛斗瓊樓玉宇空人心千年白石今可煮  
一掬泉香擣雲母富貴知君已厭看翠黛紅妝夢中舞  
人間月色儘風波聞道君家月最多我亦扁舟下彭蠡  
到門相訪定如何

朔方歌

朔方大野何寥哉悲風慘淡從天來初如巨壑吼陰浪  
忽似暗空行怒雷嚴風吹霜石為裂淅瀝飛沙砭人骨

萬里書生二十餘足馬來為朔方客朔方之人膽如斗  
不鬪才華鬪身手無復悲歌慷慨聲猶能使氣屠雞狗  
憑高仰視太行山山氣空濛紫翠間東西日月自吞吐  
古今煙雲相往還太行勢盡西山起鳳舞龍蟠聳神偉  
昨夜燕山雪作團散落飛花漢宮裏朔方猛士氣凌雲  
白首防邊未策勲馬上相逢淚如瀉嗟我何為朔方野

梅花五友歌

古人一水畫十日今我此畫凡幾筆生綃數幅畫水石

獨立寒梅妙難識當其痛飲三百觴胸蟠勁氣不肯降  
龍牙弄泉噴白雪鶴翅披漢飛玄霜瀟湘之濱渺平楚  
望美人兮在南浦夢回殘月照寒衾忽見瑤臺淡妝舞  
此時見畫心悵然吟蛩落木秋無邊化工知我惜花意  
墨香到骨花能言長松飛來蹙成卷竹色蘭芳靜相見  
吾廬雖小物色多不待更買鵝溪絹

松障圖歌

何人獨立身堂堂十八公子鬚髯蒼凝冰不遣勢摧折

清籟時與髯低昂蘭為兄兮雪為友燕坐松間自呼酒  
眼花耳熱鱗鬣生千尺龍蛇入揮手手中松月自離筆  
已見雲煙生翁鬱儻非白晝堂宇空真恐幽陰鬼神出  
平生始識顏平原堅苦絕勝甜中邊世間畫史千金價  
惜哉此松不多畫

紙帳歌和全初上人韻并簡劉光朝時朝納寵  
故戲之耳

道人於事百不聞歲晚鶴骨誰相溫禪林蠶光薄如霧

宜月宜霜復宜露夢回蘄竹生清寒五月幻得梅花看  
初疑脆膜輕無力一片凝秋剡中色道人巧手天機深  
兩杆獨伴堦蛩吟卷舒似聽桔葉音珍重莫遣煙煤侵  
百年富貴誰能免錦幄彤廬語恩怨可憐老楮歲寒心  
用舍在吾難自薦君不見燕山穹廬擅百幅狎坐圍春  
醉紅玉道人不學製戎衣空煮南山卧茅屋安知幕天  
席地一希夷長共青山白雲宿

奉和趙秋巖閨七夕樂章



翠鳳穆穆刷新羽一霎香車洗塵宇秋瓜老盡畫屏空  
小扇無人拜星渚武丁去作宮門仙昨暮重開青瑣煙  
長河十日一到海三疊回波金碧鮮剛風洶湧太古裂  
天上至尊寧晏眠六龍西行鼓聲急芙蓉捲露旌旗溼  
今年烏鵲最辛勤禿尾爬沙向龍泣祇憂帝怒星為石  
八極長懸曙光赤鵲飛入海海未回化石相望見何日

貧女行

貧家養女纔十五手足如綿獨當戶阿爺前月去行商

小弟伶仃未離母筠籃日暮挑菜葵倩人遠糴防朝炊  
簪花枝重黃垂額汲澗泉深綠照眉生時不得嫁時力  
却喜夫家慣耕織堂前供養老姑存姑為艱難少顏色  
夜來小弟報平安見說新年百計寬此身豈願獨溫飽  
父母養我良辛酸

萬里行

恨身不及生北方出門萬里無羸糧飢鷹志豈在狐兔  
日暮啄雪猶徬徨早年結束耻游俠絕處李益并李陽

搏捕又不學劉毅百萬一擲生輝光縱鱗暫脫騎鯨勢  
弱羽徒干薦鶚章門下雖通齊相國馬前難拜北平王  
歸來把鏡但搔首科斗蟲魚負君久金章一笑雷電奔  
我豈終身合箝口錦媽鴨綠芙蓉秋觥船卷月秦姬樓  
蛾眉為我歌世事何必愁東邊日出西邊沒南北生人  
俱白頭

集民謠

苗青青東阡西陌苗如雲經年不雨過秋半苗穗不實

空輪囷田家留苗見霜雪免使糶歲勞耕耤縣官催租  
吏胥急糶粟輸官莫論直勸農使兮不汝恤

蕨澄澄新春食蕨留蕨根凌晨斲根暮春杵湫湫大甕  
流黃渾常年春寒粉始凍誰信秋暑霜翻盆窮通有數  
今已識為死為生尚難測獨立蒼茫面如雪

和陸放翁白苧詞

美人獨宿青樓空素煙不斷楊柳風含情脉脉剪刀裏  
一片湘江明月中去年秋機織雙杵裁寄征夫送寒暑

望斷遼陽信不歸  
長夜停梭聽鸚鵡

宋本

船上謠送伯庸以番貨事奉使閩浙十首

錄六首

江華江月要才情  
多病堪憐馬長卿  
莫向都門折楊柳  
帝鄉春色不南行

琉球真臘接閩婆  
日本辰韓濊貊倭  
番船去時遺碇石  
年年到處海無波

湧金門外是西湖  
隄上垂楊盡姓蘇  
作得吳趨阿誰唱

小卿墳上露蘭枯

舊時家近黑橋街三十餘年不往來憑仗使君一問訊

楊梅銀杏幾回開

余以至元廿六年出杭故居東廂隅四條巷旁有橋名黑橋居有楊梅銀

杏二樹在

巨井上園

素馨華畔十八孃炎雲瑞露酌天漿一日供厨三百顆  
使君館券莫支羊

東海澄清南海涼公厨海錯照壺觴郎君煮好江珧脆  
水母線明烏賊香

灤河吟

灤河上遊陘涓涓僅如帶偏嶺上橫渡復遶行都外頗  
聞會衆潦既遠勢滂沛雖為禹貢道獨與東海會乃知  
能自致天壤無廣大

宋褰

涼夜吟

十五  
歲作

雲頭金玦秋意生南城啼鳥三四聲溽溽斜露銅鋪溼  
闌下幽花香氣清倡樓苔華咽凝管波底老龍求子鳴

蕭蕭竹樹小山雨驚覺佳人夢中語濕螢寥落階莎寒  
拂拭桃笙掩閨戶

洗車雨

每七日有雨俗謂  
天帝為織女洗車

一從去歲閑油壁塵暗香輶有誰拭瓊娥玉媵莫遲回  
為我飛書呼軫畢雄雷雌電傾河來寶輪濯濯無纖埃  
桂香陌上不泥濘虛無指點回蓬萊烏橋銀浦沾濡徹  
鳳靴鸞鞭潔如雪猶恐黃姑沒病深更擘濕雲填古轍

秋絃怨



海風吹涼薄璇宇桂壓鉤闌秋作主銀灣凝月澹游溶  
雲彩粼粼騫鳳羽玉帳縣沙塞夢寒沙淚啼秋山迸泉  
哀蛩不解論心素金字筵篋挑夜絃大漠沙如雲去京  
三萬里絃聲隔秦城無路入君耳七星橫西露漫漫金  
刀翦衣丁夜眠他日賜金高似屋嫖姚應是貯嬋媛

流黃引

桂庭月午啼蛩閒鸞宮露下冰紈單酥燈毳帳鴈門塞  
妾心料此中閨寒流黃縮澀微含潤錦石鋪雲瑩相襯

細腰杵急夜如年擣碎商飈不知困春纖易製添光澤  
鳳花入眼波紋溢東天皜皜呼侍兒快取衣箱金粟尺

竹枝歌

洞庭舟中賦

東山日赤雲氣昏河姑勸我莫出門持筐採得桑葉滿  
直到阻雨溪南村

竹枝歌

送余德輝還池州

沙渚青青芳草茁梅根潮落蒲芽發江頭少婦卜金錢  
行人歸來有華髮

楊柳詞

夾道青青到鳳城一般飛絮兩般情  
離筵見處泣相送  
歸鞍撲著喜相迎

北客還鄉二十年來時楊柳故堪憐  
而今張緒生華髮  
手弄柔條一惘然

轆轤曲

漢月轉桐枝羅衣怯嫩颼銀鉶輕墜放  
驚散乳鴉兒  
綠水曲

妾家若耶溪門扉綠水西  
桂月破煙暝波明楓影低  
潮痕暗沙觜浦影空雲飛  
蘋洲風未起待妾採蓮歸

楊花曲

宮鶯百轉花房委燕子日長三月尾  
玳瑁鉤簾後閣空殘紅拂度銀塘水  
白袷春衫俠少年旌旗別恨相縈牽  
盧家小娘不閉戶低回交舞妝臺前  
軟風吹香嬌脉脉西園塢徑東園陌  
雲踪雨跡杳難憑青年誤殺金釵客

杏蠟辭

和馬伯庸泰定元年作時初忝第科

霞綃簇春笑紅雨曲江芳情惱游子郎君焰光高二丈  
燒殺杏花三十里觴酣小駐龐姨家鶯歌溜玉鏗紅牙  
華裾飄麝鬢豪綠上馬行陪擇壻車

王士熙

雲山辭

山氤氲兮出雲又泠泠兮以雨倏日出兮雲飛山青青  
兮極浦橫浮雲兮水粼粼褰杜若兮采白蘋萼荷宇兮  
桂為棟臨江罽兮悵懷人

江上竹

蕭蕭江上竹依依徧山麓  
晨霞屑明金夕月擁寒玉  
梢綠鳳翼翼葉葉青鸞足  
深叢疑立壁高節折垂纍  
荒涼含雨露歷亂同草木  
不求筍煮羹不求椽架屋  
寒條作長笛吹我平調曲

青青河畔草

青青河畔草江上春來早  
春來不見人思君千里道  
千里君當還夙昔奉容顏  
青樓獨居妾含情山上山  
白鴈

歸塞北一行千萬憶團團月出雲却使妾見君

君莫舞

獸環魚鑰開九門長刀閃月如雲屯軍中置酒毛髮立  
楚漢瞋目爭乾坤楯上切肉衫血漉白壁入手玉斗破  
悲風烈日吹秦聲赤龍將飛沐猴卧項莊項莊君莫舞  
以力取人天不與明珠美女棄若遺誰遣驪山作焦土  
戰旗高高日向曛天空雲散猶待君漢王夜走灞上路  
紀信成灰范增去

## 行路難

請君莫縱珊瑚鞭，山高泥滑馬不前。  
請君莫駕木蘭船，長江大浪高觸天。  
瞿塘之口鐵鎖絡石棧，縈紆木排閣。  
朝朝日日有人行，歇擢停鞚驚險惡。  
飢虎坐嘯哀猿啼，林深霧重風又淒。  
冒衣絆足竹刺短，潛形射影沙蟲低。  
昨夜雲月暗，今朝煙霧迷。  
青天蕩蕩紅日遠，王孫遊兮草萋萋。  
行路難，歸去來，振衣滌塵轉淮海。  
故山之雲莫相猜，行路難，古猶今。  
翻手覆手由人心，江空月落長短。



吟

麟麟之車渡黃河汎汎之舟江上波漢使叱馭九折坂  
將軍橫旗下牂牁君不見長安大道人如蟻漏盡鐘鳴  
行不已又不見吳江八月人戲潮赤脚蹴踏潮愈高男  
兒有志在四方憂思坎軻纏風霜不及江南豪富兒一  
生足不下中堂烹龍膏薦麟髓千金一笑如花美忽然  
對面九疑峯送君千里復萬里生鐵無光劍花紫薄霜  
碎碎月在水雞鳴函谷雲縱橫志士長歌中夜起

古意

彈琴罷離聲置酒喜合并奉君藍田之玉卮涼州蒲萄  
新釀成君醉不肯飲月華為誰明羅襦起舞錦茵動花  
落簾前驚乳鳳五更上馬雲滿天馬蹄却厭鳴珂重不  
向章臺學鬪雞為通名姓入金閨銅壺滴滴宮漏晚鴛  
鴦飛來池水滿

玉環引送伯庸北上

崑山有美璞昆吾有寶刀推雪漉寒冰凝此英瓊瑤團

團月長滿晶晶白雲淺似環環無窮寥寥人意遠有美  
天山人皎潔同精神禁垣青春多大佩垂朝紳腰無大  
羽箭肘有如斗印結束上京行騶駒驟長靽不採珊瑚  
鈎海深安可求不執水蒼璧漢庭羅公侯愛此玲瓏質  
題詩贈與客百金一朝傾三年不可得不得只空行山  
泉琴峽鳴摩挲龍門石憶憶應留情天風北極高歸塗  
踏霜草不惜玉環分只願君還早

早朝行

石城啼鳥翻曙光千門萬戶開未央丞相珂馬沙堤長  
奏章催喚東曹郎燕山驛騎朝來到雨澤十分九州報  
輦金馱帛分遠行龍沙士飽無鼓聲閣中龍牀琢白玉  
瑟瑟圍屏海波綠曲闌五月櫻桃紅舜琴日日彈薰風

白苧詞

窄衫裁苧清如冰踏茵起舞雲層層纖手宛轉拂輕燕  
畫鼓逐拍涼州徧長衢蹀躞去馬蹄五更殘月聞鶯啼  
誰能不思更不憶獨倚朱門望雲立庭前碧樹垂晚花

來禽熟時郎到家

李宮人琵琶引

瓊花春島百花香太液池邊夜色涼一曲六么天上譜  
君王曾進紫霞觴

龍柱雕犀錦面妝春風一抹綵絲長新聲不用黃金撥  
玉指蕭蕭弄晚涼

鸞輿五月幸龍岡宣喚新聲促曉妝撥斷冰絃秋滿眼  
塞天雲碧草茫茫

紫檀別殿鎖春光  
鈴索聲閑白日長  
不似開元教坊曲  
太真微醉撥龍香

一入深宮歲月長  
承恩曾得侍昭陽  
檀槽按出新翻曲  
五色雲中落鳳皇

越羅蜀錦舊衣裳  
贏得旁人識賜香  
莫對琵琶思往事  
聲聲彈出斷人腸

瑤池高宴奏清商  
偷得蟠桃帶露嘗  
莫道仙凡便成隔  
時時青鳥向人翔

賤妾霞宮母在堂當年雲鬢共蒼蒼太平傳得梨園譜  
似說春風夢一場

劍舞當年識大孃花奴羯鼓漫悲傷貞元朝士仍多在  
應笑青衫泣白郎

竹枝詞

居庸山前澗水多白榆林下石坡陀後來纔度槍竿嶺  
前車昨日到灤河

宮裝騷褻錦障泥百兩羶車一字齊夜宿巖前覓泉水

林中還有子規啼

新雨霏霏綠蜀勻  
馬蹄何處有沙塵  
阿誰能翦山前草  
贈與佳人作舞茵

車簾都卷錦流蘇  
自控金鞍撚僕姑  
草間白雀能言語  
莫學江南唱鷓鴣

山前馬陳爛如雲  
九夏如秋不是春  
昨夜玄冥剪飛雪  
雲州山裏盡堆銀

山上去採芍藥花  
山前來尋地椒芽  
土屋青帘留買酒



石泉老衲喚供茶

上都柳枝詞

曾見上都楊柳枝  
龍江女兒好腰肢  
西錦纏頭急催酒  
舞到秋來人去時

惹雪和煙復帶霜  
小東門外萬條長  
君王夜過五花殿  
曾與龍駒繫紫韁

來時垂葉嫩青青  
歸去西風又飄零  
願得儂身長似柳  
年年天上作飛星

儂在南都見柳花花紅柳綠有人家如今四月猶飛絮  
沙磧蕭蕭映草芽

雪色驂騑窈窕騎宮羅窄袖袂能垂駐向山前折楊柳  
戲撚柔條作笛吹

偏嶺前頭樹樹逢輕於蒼檜短於松急風卷絮悲游子  
永日留陰送去儂

合門嶺上雪淒淒小樹雲深望欲迷何日汶陽尋故里  
綠陰陰裏聽鶯啼

審濟

送別曲

曠曠出扶桑照見大黑洋  
直升中天上萬國蒙清光  
三山樓閣蓬萊東丹霞翠壁金芙蓉  
鴻濛凝結古元氣我欲往遊從赤松  
郊郎朝玉京船發南風生海頭撾鼓人  
起舞椎牛醺酒祈神明遠寄平安書  
十日到直沽阿翁髮半白莫醉黃公壚

胡助

春草曲

余為太常博士歸田道出梁溪為華彥清賦此

春風如水流春草生芳洲遊子有遠志居人無別愁居  
人伊誰華氏子不出庭闈奉甘旨可憐遊子萍相似春  
愁草綠千萬里兒衣母線春風吹春暉滿堂草菲菲遊  
子歸來慈母喜階前鬬草爭兒戲

歐陽應丙

小姑山謠

小姑近在水中央薜荔為衣蘭佩香翡翠奮翼青霞光

宛其螭首蛾眉長  
紫金芙蓉出綠波  
白玉臺鏡開青螺  
涉江浩蕩興無極  
臨風窈窕揚清歌  
大姑阿姨寄傳語  
相望煙波奈何許  
日暖江南滿白蘋  
金釵落地湍風起

趙櫛

曉寒曲

曲闌廉纖杏花雨  
博山煙飛裊晴縷  
夢回金帳春融融  
鸚鵡驚寒隔窗語  
美人曉妝雲滿梳  
柳風吹香入氍毹  
翠環裊裊綰不斷  
寶釵壓鬢紅珊瑚  
了鬟捲簾采桃葉

驚起一雙黃蛺蝶

秋宵吟


平林薄暮風淅瀝黃金滿地秋狼籍新月出嶺光欲流  
萬籟無聲夜寥闌誰家美人吹鳳簫彩鸞對舞摩青霄  
闌干縹緲碧雲遠天風入骨涼蕭蕭銅壺水寒銀箭澀  
玉露滴空衣袂濕釭花落盡爐煙收幽懷耿耿生新愁  
寒螿啼碎人間秋

御選元詩卷四

謹案卷四第三頁後五行裕嚕布哈舊作淵魯不  
花今改 十六頁前六行克呼濟蘇舊作濶里  
吉思今改







總校官庶吉士臣侍朝

校對官檢討臣蕭九成

謄錄監生臣劉天倉